



Aningaasaqarnermut Nunanullu Allanut Naalakkersuisoq

Aningaasaqarnermut Ataatsimiititaliap suliaq nr. 01.31.06/06-00169 pillugu tallimangornermi ulloq 26. maj 2006-imi aalajangiinera pillugu Naalakkersuisunut ilisimatitsineq.

(Naalakkersuisut ulloq 6. maj 2006-imi ataatsimiinneranni imm. 2d)

**Kontomi pingaarnermi 73.01.09-mi, Angallannermik aaqqissuussinermi
ikaarsaariarnermi sillimmatinut tunngasumi, aningaasaliissutit
atugassiissutigineqarnissaat**

Naalakkersuisut inassutigaaat,

Kontomi pingaarnermi 73.01.09-mi Ikaarsaariarnermi sillimmatit –
Angallannermut suleriaaseq, aningaasaliissutit 4 mio.kr.-nirik
appartinneqassasut.

Kontomi pingaarnermi 20.11.50-mi Ingerlatsinermit sillimmatini
aningaasaliissutit 4. mio.kr.-nirik qaffatsinneqassasut

Ineqarnermut, Attaveqarnermut Aatsitassanullu naalakkersuisoqarfik
pisinnaatinneqassasoq, 350.000 kr.-nit iluanni 2006-mi isumaqatigiissummut
pioereersumut ilassutitut isumaqatigiisuteqarsinnaanissaanik, 2006-mit 2010-mut
Paamiut timmisartuussivigineqartarnissaanut Air Greenland A/S peqatigalugu,
piffissami 17/5-mit 31/12-2006-ip tungaanut sapaatip akunnikkaartumik
Kangilinnguit miffigisassallugit.

Ineqarnermut, Attaveqarnermut Aatsitassanullu naalakkersuisoqarfik
pisinnaatinneqassasoq, 50.000 kr.-nit iluanni isumaqatigiissummut 2006-mi
Disko-mi qulimiguulimmik angallassinermi Isumaqatigiissummut
atuutereersumut Qeqertarsuup Kangerluullu akornani qaammammut
marloriarluni qulimiguulimmik angallassisinnaanissamut, sullissinermit
isumaqatigiissummi piffissami decemberip aallaqqaataaniit, decemberip 31-anut
2006-mi ilassutissamik isumaqatigiisuteqarnissamut.

Ineqarnermut, Attaveqarnermut Aatsitassanullu naalakkersuisoqarfik
pisinnaatinneqassasoq, 2006-mi 500.000 kr.-nit Timersoqatigiiffiit kattuffiata
akuerisaanik timersornikkut aaqqissuussanut peqataasut angallannikkut
akitsuutitigut akiliutaannut utertitsissutissatut atugassanut.

Ineqarnermut, Attaveqarnermut Aatsitassanullu naalakkersuisoqarfik
pisinnaatinneqassasoq, ilaasunut angallannermi isumaqatigiissummik
atuutereersumik 2006-mi Uummannami eqqaanilu 2,0 mio. kr.nit iluanni
atuutereersumik isumaqatiginninniutiginneqqinnissamik, minnerunngitsumik

ilaasunut inissaqartitsisinnaanermut pitsanngorsaatissamut, minnerunngitsumik Uummannap Qaarsullu akornani.

Ineqarnermut, Attaveqarnermut Aatsitassanullu naalakkersuisoqarfik pisinnaatinneqassasoq, 2006-mi 600.000 kr.-nit iluanni ilaasunut akitsuutinik utertitsisarnissamut, tamatumani pineqarlutik utoqqaat peqatigiiffiisa aaqqissuusaat aamma aasaanerani Upernavimmiit angalasut kiisalu ilaasut nassataanik sullissinerup bilitsinillu suliaqarnermut tunngasutigut ajornartorsiutit aaqqiivigineqarnissaat.

Aningaasaqarnermut Ataatsimiititaliap oqaaseqaatai

Inatsisartut Aningaasaqarnermut Ataatsimiititaliaata akuersineratigut tamanut timmisartuussisarnissamut umiarsuartigullu angallassisarnissamut angalatsisartunut 2006-imi isumaqatigiissusiornissamut Naalakkersuisut piginnaatinneqartut kontomut pingaarnermut 73.01.09-mut oqaasertaliussani allassimavoq.

Isummernissamut tunngavissiaq matumani pineqartoq aqputigalugu sillimmatit 4 mio. kr.-it siunertanut assigiinngitsunut arlalinnut atugassiissutigineqarnissaat kiisalu 4 mio. kr.-it ingerlatsinermut sillimmatinut nuunneqarnissaat Naalakkersuisut kissaatigaat. Aningaasanik ingerlatsinermut sillimmatinut nuussinermi siunertaavoq aningaasat taakku amerlaqataat 2007-imi aningaasanut inatsisissami angallannermut tunngasunut immikkoortinneqarnissaat.

Aningaasaqarnermut Ataatsimiititaliami ikinnerussuteqartoq Demokraatit ilaasortaataat qinnuteqaammut ima oqaaseqaateqarumavoq:

Aallaavittut isigalugu qinnuteqaat Demokraatinit taparserneqarsinnaavoq. Taamaattorli Ummannap eqqaatalu kiffartuunneqarnera pillugu KNI-p kiffartuussinissaanik isumaqatigiissutip isumaqatigiinniutigineqaaqqinnissaanut aningaasaleeqqinnissaq tunngavissatut maanna pigineqartut naapertorlugit Demokraatinit akuersissutigineqarsinnaangilaq. Taamaalilluni angallassinerep annertusaavigineqarnissaanik pisariaqartitsinermut uppersaaserneqanngitsumut kisitsisitigut paasissutissat amigartut Demokraatinit oqaatigineqassaaq. Taamaalilluni angallassinerep annertusaavigineqarnissaanik kissaateqarneq sorsipianik naatsorsuutiginnilluni pinersaq takuneqarsinnaangilaq. Qaatsiartaammik, ilisimasat naapertorlugit suli ingerlalinngitsumik ingerlatsinermi manna tikillugu misilittakkat tunngavigalugit aningaasanik qinnuteqarneq pisoq Naalakkersuisut isummernissaannut tunngavissiami allassimavoq. Siuliani allassimasut tunngavigalugit suliallu qulaajaavigineqarnissaa siunertaralugu pineqartumut akisussaasutut Naalakkersuisup isumasioqatigiilluni ataatsimiinnissamut aggersarneqarnissaa Demokraatinit kissaatigineqaralarpoq. Tamannali Aningaasaqarnermut Ataatsimiititaliami amerlanerussuteqartunit kissaatigineqanngilaq.

Taamaalillutillu Uummannap eqqaani ilaasunik angallassineq pillugu isumaqatigiissutip isumaqatigiinniutigeqqinneqarnissaanik inassuteqaat tunngavissatut maanna pigineqartut tunngavigalugit Demokraatinit akuersarneqarsinnaangilaq.

Naggasiullugu oqaatigineqassaaq kontomut pingaarnermut 73.01.09-mut missingersuutinut ilanngussaq tamakkiisuunngimmat. Tamatuma saniatigut kontomut pingaarnermut 20.11.50-imut, Ingerlatsinermut sillimmatinut tunngasumut, missingersuutinut ilanngussap danskisuuani takuneqarsinnaavoq aningaasaliissutinik matumani allannguinerup kingorna aningaasaliissutit X kr.-iulersut. Missingersuutinut ilanngussap kalaallisuuani tamanna pillugu paasissutissanik ilanngussisoqarsimanngilaq. Aningaasaqarnermut Ataatsimiititaliamit inussiarnersumik paasissutissiissutigineqassaaq Aningaasaqarnermut Pisortaqrarfiup paasissutissiissutai naapertorlugit suliame matumani pineqartumi X-tut taallugit pineqartut tassaammata 20.392.000 kr.-it! Kukunerit taakku missingersuutinut ilanngussat 2006-imi

ilassutitut aningaasaliissutitut inatsimmut ilanngunneqannginneranni Naalakkersuisunit aaqqinneqareersimassasut naatsorsuutigineqarpoq.

Aammattaaq oqaatigineqassaaq atuartut angallannikkut akitsuutitigut akiliutaannut aningaasat utertissutissat pillguit inassuteqaat atortussat kalaallisuuanni ilanngunneqarsimangimmat.

Kiisalu missingersuutitut ilanngussat Aningaasaqarnermut Ataatsimiititaliamut nassiunneqartut tamakkiisuullutillu pitsaassutsimikkut qulakkeerinniffigineqartarnissaat qulakkeertaqqullugu ataatsimiititaliap Naalakkersuisunit aammaarluni **kaammattuutigissavaa.**

Aningaasaqarnermut Ataatsimiititaliap aalajangiinera

Naalakkersuisut inassuteqaataat Aningaasaqarnermut Ataatsimiititaliami amerlanerussteqartunit **akuersissutigineqarput.**

Inussiarnersumik inuulluaqqusillunga

Ellen Christoffersen
Aningaasaqarnermut Ataatsimiititaliap siulittaasua